

æek
22.korrika

1. ALBISTEA

2021/11/17



C1

MAILA

Badator 22. KORRIKA!

Hiru, bi, bat... eta, ekin! **ELKARREKIN!**

HITZ EKIN

Amurriotik Donostiara

2022ko martxoaren 31tik apirilaren 10era

Irudia (AEK): 22. KORRIKA aurkezpena Donostiako San Telmo Museoa



Asier Amondo Gorostizaga KORRIKA arduradunari elkarrizketa

“Ekiteko ordua heldu da: euskara hitzetik ekintzara eramateko unea”

Azkenean esan dezakegu: “Badator KORRIKA!”. 2022ko martxoaren amaieran KORRIKA, euskararen aldeko lasterketa erraldoia, Euskal Herrian ibiliko da berriro, eta inoiz baino nabarmenago, gure herriak kolorez, musikaz, ilusioz eta, batez ere, euskaraz jantziko ditu. Datorren urtekoa 22. KORRIKA izango da, eta, lasterketaren aurkezpena egiteko, AEK-k Donostiako San Telmo Museoa bildu ditu kazetariak. Bertan, Asier Amondo KORRIKA arduradunarekin hitz egin dugu.

Hilabete gutxi barru, KORRIKA ibiliko da Euskal Herriko kaleetan zehar... Jende askok espero zuen albiste da. KORRIKA “normala” aurreikusten al duzue?

Dakizuen bezala, aurreko KORRIKA amaitu zenetik ohi baino denbora gehiago igaro da: urtebete luze-luzea, eta ez nolana hainkoa. Pandemiaren gorenarekin ezinezkoa zitzaien ezagutzen eta maite dugun lasterketa antolatzea; eta atzeratu genuen, KORRIKA desiratzen ditugun baldintzetan egin ahal izateko. Datorren urterako baditugu hainbat aukera mahai gainean; eta, azken datuen arabera, zorionez, ematen du agertoki baikorrenera goazela.

Baina, zer da KORRIKA? Nola azalduko zenioke ezagutzen ez duen bati?

KORRIKA euskararen aldeko lasterketa erraldoia da, Euskal Herrian egiten den ekimenik jendetsuena eta zirrargarriena. 11 egunez, etenik gabe, gau eta egun, 2.500 kilometro inguru egingo ditugu Euskal Herriko bazter guztietatik, mezu sekretua gordetzen duen lekukoa eskuz esku daramagula.

Eta horrekin guztiarekin, zer mezu transmititu nahi duzue?

“HITZEKIN” da edizio honen leloa, eta bi hitzek osatzen dute: “hitza” eta “ekintza”. Hizkuntza bat hitzez osatzen da, baina ekimenek eraikitzen dute hizkuntza baten komunitatea. Guk uste dugu ekiteko ordua dela: euskara hitzetik ekintzara eramateko

unea. Euskararenganako aldekatasunetik konpromisora jo behar da, eta konpromisotik eragitera, denok urrats sendoagoak egin ditzagun, jendartearen nahi eta beharrei erantzuteko.

Oraingoa 22. edizioa da. Askotxo da hori...

Eta guztietan ekimena etengabe haziz joan da, KORRIKA asmatu zuten zoro zoragarri horien garaitik gaur egun arte. 1980. urtean egin zen lehenbizikoz, eta orain 22. edizioa ospatzeko unea iritsi da. Zifra zehatzak ematea zaila da, baina esan ohi da hiru euskal herritarretik batek parte hartu duela. Horregatik, oso garrantzitsua iruditzen zaigu ilusioa suspertzea eta KORRIKAK berekin ekarri ohi duen euskararen aldeko uholdea berreskuratzea: kalean, sareetan, ikastetxeetan, diasporan eta abarretan.

Horri lotuta, KORRIKA “mundiala” dela ere esan daiteke, ezta?

Bai, hala da! Mundu osoko 60 bat tokitako euskaldunek ere keinua egin nahi diote KORRIKari, kontinente guztietako hiri nagusietan: La Platan, San Frantziskon, New Yorken, Parisen, Berlinen, Bartzelonan, Bruselan, Shanghain, Tokion...

Eta hori guztia gutxi balitz bezala, KORRIKAREN “ahizpak” ere hor ditugu...

Bai, horixe da. Nazioarteko izaera horri lotuta, baditugu munduan zehar hizkuntza gutxituen alde antolatzen diren gure KORRIKAREN moduko

ekimenak ere; hau da, KORRIKAREN ahizpak: Hego Amerikan, maputxeen hizkuntzaren aldeko lasterketa (Lefkantun), Britainian (Ar Redadeg), Irlandan (Rith), Galesen (Ras yr Iaith), Katalunian (Correllengua) eta Galizian (Correlingua).

Lehenengo edizio hura Oñatin hasi eta Bilbon amaitu zen. Nondik nora joango da 22. KORRIKA?

AEKn badugu nolabaiteko "arau ez idatzi" bat: hurrengo KORRIKA beti hasiko da aurrekoa amaitu den herrialdean. 21. edizioa Gasteizen bukatu zenez, Arabatik abiatzea egokitzen zitzaigun, eta pentsatu genuen Amurrio oso herri egokia zela 22. KORRIKARI hasiera emateko. Amaiera-egunari dagokionez, sorpresa gutxi: hiriburuak txandakatzen ditugu, eta oraingoan Donostiari tokatu zaio lasterketa finitzen ikustea. Alabaina, eguneroko ibilbide zehatza ezagutzeko apur bat itxaron behako duzue.

Ados, zain egongo gara, beraz! Dena den, ezer aurrera dezakezue KORRIKA alaituko duen kantaz?

Gai hori sekretupean gorde nahiko genuke pixkatxo batean; baina egon adi: berehala izango dugu prest zuokin guztiokin partekatzeke, eta gustatuko zaizuelakoan gaude!

21. KORRIKAK Txillardegia omendu zuen. Jakin daiteke nor omenduko duen 22. edizioak, ala hori ere sekretua da?



Asier Amondo, Gorostizaga

Bada, bai, hori aurreratzeko moduan gaude! Pirritx, Porrotx eta Marimotots pailazoak omenduko ditugu oraingoan. Zergatik beraiek? 34 urteko ibilbidea egin dutelako euskal munduan, eta, are garrantzitsuago, euskaraz; eta eragileak direlako, orainaldiari eta etorkizunari begira daudenak. Pirritx, Porrotx eta Marimotots azken hogeita hamalau urtean adierazi duten konpromisoagatik eta ekinagatik egin nahi die gorazarrea 22. KORRIKAK.

Urtebeteko atzerapenez dator KORRIKA, eta, ezaguna denez, babes ekonomikoak ere badu garrantzirik...

Euskaltegien eguneroko lana indartzeko dirua biltzea da KORRIKAREN helburu nagusietako bat, eta 22. KORRIKAK jasoko duen ekarpena Euskal Herri osoko bere euskaltegiei laguntzeko baliatuko du AEK-k. Iazko "Bultza euskaltegiak" kanpainan nabarmendu genuen moduan, administrazioetatik aurrerapausoak eman badira ere, oraindik badago zer hobetu, eta edozein laguntza biziki eskertuko dugu. Materiala salgai egongo da, eta diru-bilketak ere egingo ditugu; dena den, zalantza barik, KORRIKA laguntzeko modurik onena KORRIKA LAGUNTZAILEA izatea da. Izen-emate kanpaina hemendik gutxira jarriko dugu abian.

Tira, bada, ekin KORRIKARI...

Horixe! Bidelagun izango garelakoan, errepidean ikusiko dugu elkar!

► Azpimarra itzazu testuko esaldi hauek berridazteko forma egokiak.



1. Euskal Herrian egiten den ekimenik jendetsuena eta zirrargarriena da. Ekimenik jendetsuena **izanik / izateaz gain / izateagatik**, zirrargarriena ere bada.
2. Etenik gabe, egun eta gau, 2.500 kilometro inguru egingo ditu KORRIKAK. Etenik gabe, egunez **ezik / ez ezik / izan ezik**, gauetz **ere / ere bai / baita** 2.500 kilometro kilometro inguru egingo ditu KORRIKAK.
3. Guk uste dugu ekiteko ordua dela. Ekiteko ordua dela **deritzogu / iritziz gaude / irizten dugu**.
4. Konpromisora jo behar da, denok urrats sendoagoak eman ditzagun. Konpromisora jo behar da, denok urrats sendoagoak **emateagatik / emanik / ematekotan**.
5. Euskararen aldekotasunetik konpromisora jo behar da jendartearen nahi eta beharrei erantzuteko. Euskararen aldekotasunetik konpromisora jo behar da jendartearen nahi eta beharrei erantzun **diezaiozun / diezaiegun / ditzagun**.
6. Horregatik, oso garrantzitsua iruditzen zaigu ilusioa berreskuratzea. Horregatik, oso garrantzitsua deritzogu ilusioa **berreskuratzea / berreskuratzeagatik / berreskuratzeari**.
7. AEKn badugu nolabaiteko "arau ez-idatzi" bat. AEKn badugu arau bat, idatzita ez **egotearren / egonagatik ere / egoteagatik** ere.

PROZEDURA:

- ▶ KORRIKari buruzko bideoa ikusi¹, eta, irudien laguntzaz, lehen albistea aurkeztuko dugu.
- ▶ Bakarka, elkarrizketa irakurri, eta ulertzen ez dituzten hitzak azpimarratuko dituzte (2.- 3. or.).
Oharra: B2 eta C1 mailen arteko ezberdintasun bakarra berridazketak dira.
- ▶ Binaka lehenik, eta talde handian gero, lexikoari dagozkion zalantzak argituko ditugu.
- ▶ Bakarka, berridazketak egingo dituzte (3. or.).
- ▶ Ondoko ikasleekin egindakoa alderatuko dute, eta elkarri zalantzak argitzen saiatuko dira.
- ▶ Talde handian zuzenduko dugu.

Erantzun zuzenak (azpimarratuta):

1. Ekimenik jendetsuena **izanik / izateaz gain / izateagatik**, zirrargarriena ere bada.
 2. Etenik gabe, egunez **ezik / ez ezik / izan ezik**, gauez **ere / ere bai / baita** 2.500 kilometro kilometro inguru egingo ditu KORRIKAK.
 3. Ekiteko ordua dela **deritzogu / iritziz gaude / irizten dugu**.
 4. Konpromisora jo behar da, denok urrats sendoagoak **emateagatik / emanik / ematekotan**.
 5. Euskararen aldekotasunetik konpromisora jo behar da jendartearen nahi eta beharrei erantzun **diezaiogun / diezaiegun / ditzagun**.
 6. Horregatik, oso garrantzitsua deritzogu ilusioa **berreskuratzea / berreskuratzeagatik / berreskuratzeari**.
 7. AEKn badugu arau bat, idatzita ez **egotearren / egonagatik ere / egoteagatik** ere.
- ▶ Amaitzeko, solasaldia egingo dugu (laguntzeko, 1. albistearen titularrak² ikus ditzakezue): Zer itxura hartzen diozue 22. KORRIKari? Gustuko duzue? Zein da zuen KORRIKA IRUDIA?
Oharra: KORRIKA irudiez hitz egiteko, 21. KORRIKArako sortutako "KORRIKA IRUDIAK" ikusi eta argazki bat edo batzuk aukeratzeko esan diezaiekezue (57 irudi daude zenbakituta). Ikusi ahala, apunta dezatela paper batean zein argazki gustatu zaizkien gehien... Ikasle bakoitzak zein argazki eta zergatik aukeratu duen esango du. Ondoren, euren "KORRIKA IRUDIA" zein den galdetuko diegu: oroitzapenean iltzatuta duten une edo irudiren bat...

HIZTEGI KUTXA, lexikoa ikasteko

- ▶ Ikasi nahi dituzten hitz berriak papertxoetan idatzi, eta Hiztegi Kutxan sartuko ditugu.
- ▶ Hurrengo KORRIKA albistearen aurretik, edo beste uneren batean, Hiztegi Kutxako hitzekin jolasen bat proposatuko dugu; adibidez: "Marrazkitz" edo "Tabu".

MARRAZKITZ

- Binaka jolastuko dira. Bikote bakoitzeko ikasle bati kutxako papertxoa irakurtzen utziko diogu.
- Ikasle guztiek hitzaren esanahia ulertu dutela ziurtatu ondoren, marraztu egin beharko dute paper batean, eta euren bikotekideek hitza asmatu beharko dute.
- Hitza lehenengo asmatzen duen bikoteak irabaziko du.

TABU

- Kontzeptuak marrazteko zailegiak badira, marraztu beharrean, ahoz egingo dugu.
- Azalpenak ematen dituenak ezingo du hitza bera esan; Horren orde, eman ahalko ditu adibideak, sinonimoak, azalpenak, noiz eta non agertu zen hitza...
- Binaka jolastuko dira, eta hitza lehenengo asmatzen duen bikoteak irabaziko du.

¹ Bideoa: "21. KORRIKA: Mila esker, Euskal Herria!" <https://www.youtube.com/watch?v=WcOFegbaW6A>

² Ikusi "1 albistea TITULARRAK.odp" dokumentua, pantaila handian ikusteko pentsatua. Aurkezpen moduan ikusiz gero, titularrak "efektuekin" ikusiko ditugu. Bestela, "1 albistea TITULARRAK.pdf" ere eskura duzue, nahiago izanez gero.